

clusi habeantur, ac declarentur. Coepit vero ille ritus, qui manifesto indicio est ecclesiam nostram a Pontificia ejici atque damnari jam a Leone X. qui MARTINUM LUTHERUM & singulos ipsi faventes proscriptos atque excommunicatos hac bulla primus voluit, hinc eam mox ubi promulgata fuit, exprimi curavit D. LUTHERUS noster, & epicrisin, qua digna erat, subjunxit, & legitur utraque T. II. *Altenburg. p. 63. seqq.* ubi simul commentarii loco in bullam illam Psalmum X. Davidis ejusque illustrationem annectit, & contumeliam, qua ibi affectus erat, DEO vindicandam committit, causam interea justam strenue defendit. Conf. coeterum de hac bulla ex nostratibus DOROTH. ASCIANUS *de montibus pietatis p. 489.* ex Reformatis JOH. HENR. HEIDEGGERI *Historia Papatus Periodo VII. p. 365.* Quae vero sub cortice illius fulmina lateant, fusius adhuc in alia, quae hanc antecessit, bulla, exposuit LEO X. ac MARTINO LUTHERO omnibusque ejus doctrinae adhaerentibus aqua & igni interdixit. Extat eo Tomo I. *Altenburgico p. 445.* descripta.

## §. V.

Cum itaque, vigore harum bullarum, quid expectandum sit a judicio aulae Romanae, intelligentibus satis appareat: non mirum est, quod ex composito praecipui Scriptores Pontificii, quicquid usquam haeresium fuit, imputarent audacter Evangelicis, atque eos pro fungis haberent, & humani generis velut quisquiliis, in quas omnes veteres haereses, quae tanto ardore olim eliminatae fuissent, noviter confluxerint, & conspiraverint. Sufficiet forte si vel quatuor testimoniis rem confirmaverimus, eorum nimirum, qui inter Scriptores illos aut primum, aut primo proximum locum sibi haecenus vendicarunt; Princeps omnium esto BELLARMINUS in purpura sua sanguinem Evangelicorum ubi-